

Il niev onn cun consequenzas e responsablads

La gronda damonda ei, cu igl onn 2011 surdat la historia dil mund a l'auter onn: «Tgei porta il niev onn 2012?» Ina damonda che negin sa rispunder. Quella anflein nus en 366 dis. Astgein nus pia buca dumandar, tgei che quei niev onn porta? Dumandar savein nus bein, mo ina risposta sa era buc in horoscop ni ina profezia dar.

Pli impurtont eis ei, da far autras damondas, damondas a sesez: Tgei spetgel jeu dil niev onn ch'il Segner dat a mi? Tgei custeivladads sai jeu dar a memez ed a mes concarstgauns ed alla cuminonza? Cun tgei sai jeu far, miu niev onn a mi regalaus, custeivels e plein senn? Da tgeininas ovras sai jeu alla fin digl niev onn esser loschs?

Suenter quellas damondas san ins entscheiver a far propiests... Mo vegnan quels tals teni en e van els buc en emblidanza? Encunter la fin digl onn fa bia glied patratgs da midar l'assicuranza, ina pli bien marcau. Ils patratgs ein stai cheu, mo ord malsegirezia ni cumadeivladad salvan els la veglia. Ils patratgs ein stai buns, mo midau ha quei nuot. La situaziun ei aunc adina la medema.

“La via egl uffiern ei ina sulada cun buns propiests!” secloma in proverbi. Tgei verdad semuossa en quei plaid? Forsa meinan buca gest tut ils propiests che nus havein buca teniu en egl uffiern, denton, forsa alla malura.

La bunaveglia suletta tonscha buc. Ei sto era haver consequenzas e responsablads, schiglioc stein nus en in onn el medem liug sco oz.

Jeu giavischel a nus tuts, che nus possien far entgins pass vinavon, ch'igl onn 2012 seigi fritgeivels e prezius.

Vies Sur Peter

LAAX viseta FALERA

Messa comunabla a Falera

Dumengia, ils 29 da schaner 2012 allas 10.15h

Las suprastonzas dallas Pleivs da Laax e Falera han decidiu da festivar da temps en temps survetschs divins da cuminonza. La finamira ei da sentupar e comunicar denter vischins.

Igl emprem invit fa la Pleiv da Falera. Tuts parochians d'omnisduas pleivs ein cordialmein envidai da prender part a quella Messa a Falera. Suenter il survetsch divin vegn offeriu in aperitiv. Il meins da mars envida la Pleiv da Laax ils parochians da Falera da vegnir a messa e silsuenter tier in aperitiv.

La pusseivladad da serender a Falera ei dada cun il „Shuttle“ che parta naven dalla posta allas 09.50h. Persunas ch'ein impedidas d'ir cul bus ein supplicadas da s'annunziar en Casa pervenda, telefon 081/ 921 41 12 ni 079 283 45 80. Il transport vegn allura organisaus.

Bugen sperein che vus detties suatientscha a quei invit.

La „DVD“ Fiastas e tradiziuns da baselgia a Laax

sa vegnir retratga per 12.00 francs els suandonts loghens a Laax:

VOLG, Biblioteca Casa de Mont, Museum, Ebot AG via principala 42, Casa pervenda, tel. 081 921 41 12 ni natel 079 283 45 80. Nus giavischein bia plascher da schar reviver nossas fiastas e tradiziuns da baselgia.

Informaziuns per Laax

Communiun dils malsauns:

Mesjamna, ils 18-12-2012 suentermiezdi

Dieus paghi

Josef Solèr ha prestau cun bien humor gronda lavur els cass d'absenza da nossa calustra. Ti has adina purschiu maun e staus prompts da segidar. Per tut Tes buns survetschs admittein nus a Ti in ressentiu Dieus paghi. Nus giavischein a Ti buna sanadad ed in' emperneivla serasontga.

Cordial beinvegni

Cun l'entschatta digl onn niev astgein nus beneventar Erwin Schmid e Carlina Caviezel che segidan durant l'absenza da nossa calustra Paulina Arpagaus. Nus engraziein per la promptadad da sorprendar quell'incumbensa e giavischein bia plascher e satisfacziun.

Cant dils treis Retgs, sonda ils 7 da schaner 2012

Vus tuts essas cordialmein envidai da sentupar els quartiers cun la gruppa dils 3 Retgs per tedlar il cant e da star in mument da cumpignia. Leu vegnan dunnas ad offerir in punsch cauld. Persuenter engraziein nus ad ellas zun fetg.

La via dils Retgs ei la suandonta:

18.00h Casa Liunga, 18.20h via Davos Baselgia, 18.40h via Grava, 19.00h Cons, 19.15h via Spenda, 19.30h Center Communal, silsuenter viseta ellas ustrias tenor giavisch.

Dumengia, ils 8 da schaner 2012 contan ils Retgs en baselgia durant il survetsch divin dallas 10.15 uras.

Nus engraziein cordialmein allas scolastas ed als scolars per lur engaschi. Entras vossa bunaveglia pudein nus mantener quei usit en nossa vischnaunca. – Il recav va en favur d'affons en pitgiras. Dieus paghi per il sustegn dallas ovas caritativas.

Informaziuns per Falera

Communiun dils malsauns:

Venderdis, ils 06-01-2012 suentermiezdi

Gievgia, ils 19-01-2012 suentermiezdi

Cordiala gratulaziun

Venderdis, ils 6 da schaner 2012 astga *Martina Chistell-Cathomen* festivar siu 85-avel natalezi. Nus giavischein alla giubilara in bi di da fiasta, tut il bien, buna sanadad, la benedicziun dil Tutpussent ed in'emperneivla serasontga.

Viseta dils Retgs

Uonn astgein nus selegrar danovamein dalla viseta dils Retgs.

Quella sentupada duei crear cuminonza e schar sentir il spért social. Il recav va en favur d'affons en pitgiras. Dieus paghi a tuts che retscheivan ils Retgs ed era per Vossa generusadad enviars las instituziuns caritativas.

Viseta dils Retgs mintgamai naven dallas 16.00

Gievgia, ils 5 da schaner 2012, da miez vitg anen Venderdis, ils 6 da schaner 2012, da miez vitg ano.

In grazia fetg al scolast ed als scolars per la gronda bunaveglia da mantener quei usit, denton era per gl'engaschi da sustener affons en pitgiras.

Messa comunabla cun ils parochians da Laax

Dumengia, ils 29 da schaner 2012, allas 10.15h, ha liug in survetsch divin communabel. Suenter Messa vegn offeriu in aperitiv per puder tgirar la cuminonza. Il meins da mars essan nus envidai da serender a Laax per festivar leu la Messa.